


周氏醫學叢書

第十七冊



王叔和脈經




無錫國學專修學校藏



廿五年度教育部補助費購置

仲春 校刊



脈經序

晉太醫令王叔和撰

脈理精微其體難辨弦緊浮乳展轉相類在心易了指
下難明謂沈爲伏則方治永乖以緩爲遲則危殆立至
況有數候俱見異病同脈者乎夫醫藥爲用性命所繫
和鵠至妙猶或加思仲景明審亦候形證一毫有疑則
考校以求驗故傷寒有承氣之戒嘔噦發下焦之問而
遺文遠旨代寡能用舊經祕術奧而不售遂令末學昧
於源本互滋偏見各逞己能致微疴成膏肓之變滯固
絕振起之望良有以也今撰集岐伯以來逮於華佗經
論要訣合爲十卷百病根源各以類例相從聲色證候

靡不該備其王阮傳戴吳葛呂張所傳異同咸悉載錄
誠能畱心研窮究其微蹟則可以比蹤古賢代無天橫
矣



未經見奚獨此哉惜予之心力不能以徧及之而姑識
其端以俟世之君子有發焉耳元泰定四年九月二十
五日東陽柳贊述

醫家以切脈爲難事自素問難經及仲景書皆論其要
至西晉王叔和始彙集諸書作脈經十卷唐孫思邈著
千金方及翼方取其書爲持脈法今稱王叔和脈訣者
不知起於何時惟陳無擇三因方序脈云六朝時有高
陽生者剽竊作歌訣劉元賓從而和之其說似深知脈
經者而於篇後又自著七表八裏九道之名則無擇蓋
亦未嘗詳讀脈經者也按脈經論脈形狀秘訣二十四
種初無表裏九道之目其言乳脈云中央空兩邊實又

云減則爲寒。芤則爲虛。寒虛相搏。婦人則半產漏下。男子則亡血失精。又云脈浮而芤。浮則爲陽。芤則爲陰。脈訣乃以芤爲七表之陽。脈仲景辨脈法云脈浮大數動滑陽也。脈沉澀弱弦微陰也。而脈訣九道以動爲陰。七表以弦爲陽。似此之誤。頗多。脈經則與仲景合。而經中第十卷分上下中央爲九道者。然非歌訣九道之謂也。宋熙寧初。林億校正脈經。序中於脈訣未嘗見。稱陳孔碩序始云。脈訣出而脈經隱。愚疑脈訣或熙寧以後人所作。是不可得知也。繆翁先世藏脈經官本。及廣西本竊嘗誦而習之。後又得鄉人黃南牖家本校。雖無誤。竭來豫章幸受知憲使師公及儒學提舉柳先生間請。

刻之儒學以惠久遠二公不鄙其言慨然成之自今而後學者得見是經而用其心則歌訣之舛者不待辨而自見矣經中頗有疑字不敢輒改辨而正之姑俟後賢泰定四年歲次丁卯閏九月既望龍興路醫學教授謝

縉翁敬書



宋廣西漕司重刻脈經序

碩少時母多病課醫率不効因自誓學爲方求古今醫書而窮其原得所謂王叔和脈訣者怪其詞俚而指淺更訪老醫得脈經十卷蓋祖黃帝岐伯扁鵲經以及於張氏傷寒論條貫甚明真王氏書也驗之乃建本自是求之建陽書坊絕無鬻者板亦不存嘉定己巳歲京城疫朝旨命孔碩董諸醫治方藥以拯民病因從醫學求得脈經復借各本校之與予前後所見者同一建本也乃知脈訣出而脈經隱醫者不讀鬻者不售板遂亦不存今之俗醫問以王氏書則皆誦脈訣以對蜀人史堪以儒生名能依其所著方書脾胃條引脈訣中語而議

之曰此叔和知之而未盡也予每歎曰冤哉叔和如史
載之之工尙引訣而罪經餘又何怪焉因思今世俗醫
知有朱氏傷寒百問而不知有傷寒論俗儒知誦時文
而不知誦經史其過一律也因取所錄建本脈經略改
謬文寫以大字刊之廣西漕司庶幾學者知有本原云
然恨無他本可校以俟後之仁者侯官陳孔碩序

元刻脈經序

二首

晉太醫令王叔和撰類脈經十卷其言原本黃帝內經
靈樞素問而翼之以扁鵲倉公華佗張仲景皇甫士安
之論稱其爲醫家之一經矣今脈訣熟在人口直謂叔
和作而不知叔和所輯者脈經耳當叔和時蓋未有歌
括之作疑宋之中世始次爲韻語須便講習撫其條肄
而忘其根節者也熙寧中有旨出內府所藏古醫經方
書命光祿卿林億等典領校讎鏤板行世而脈經與焉
朱文公於慶元初跋郭長陽醫書謂俗間所傳脈訣詞
最鄙淺非叔和本書世之高醫明其爲贗遂委棄之而
獨有取於直指高骨爲關分前卻爲寸尺以定陰陽之

位爲合於難經則脈經之傳已隱雖文公亦似未知其
正出脈經也嘉定始元上遡熙寧一百四十年閩中陳
孔碩借得醫局建本是書用閣本叅訂互考刻之廣西
漕司兵燹以來板復不存知者亦寡况望其傳哉子至
江右之明年與醫學教授謝君縉翁論古書之廢慨然
欲以脈經刊置學宮使人知古昔聖賢開示醫道之源
委未嘗遺外於理者如此間請於廉訪使師公公曰醫
之有經取以利人利焉而傳是焉可泯子盍謀諸會承
命稽覆學食錢得其美贏以屬宗濂書院山長董天衢
聚工計庸付之剞劂既月告成其卷帙篇第一用陳氏
廣西之舊而不敢輒加增損志存古也噫古書廢缺世

元刻脈經移文

皇帝聖旨裏江西湖東道肅政廉訪司來申備龍興路醫學申教授謝縉翁關切惟儒學以仁義立教扶植綱常使天下不犯刑憲醫學以仁心立教拯救疾病使生民不致夭瘥故醫之素問難經與儒之六經相爲表裏皆古聖人以利天下後世爲心者也醫經之中王叔和脈經十卷誠爲醫門不易之法如蒙將脈經刻布流傳誠可裨

國朝好生之一端也緣醫別無錢糧如將上項脈經於儒學內支用有餘錢糧刻布傳遠幸甚保結關請照驗准此申乞照詳得叅詳醫學申請刊雕脈經若於合屬

學院有餘錢糧去處約量撥支工價顧匠刊雕成書從
本司收貯印行似爲便益未敢懸便申乞照詳施行得
此准申憲司合下仰照驗不妨本職從省計料合用工
匠物價鈔估體見數就行龍興路學羨餘子粒錢內支
撥刊雕申司施行須至指揮右下江西等處儒學提舉
柳文林准此

泰定四年六月初四日中奉大夫江西湖東道肅政廉
訪使朶列禿

明福建承宣布政使司右叅政徐付校脈經手札

此王氏脈經真本也後依韻而成歌不免牽綴一字失真百身莫返心竊痛之頃從馬鍾翁老先生家得此本不啻萬金便欲梓播寰中但經文句解叅錯不分字既纖細中多模糊萬一傳訛所繫匪細惟足下兼體好奇博通羣藝敬勞校正大書登梓是爲軒岐增一羽翼也足下陰功豈微也哉建初已達鄙意想蒙亮答友生徐中行頓首拜殿撰景從袁先生足下萬曆三年二月十日

日

宋校定脈經進呈劄子

臣等承詔典校古醫經方書所校讐中脈經一部乃王叔和之所撰集也叔和西晉高平人性度沈靖尤好著述博通經方精意診處洞識修養之道其行事具唐甘伯宗名醫傳中臣等觀其書敘陰陽表裏辨三部九候分人迎氣口神門條十二經二十四氣奇經八脈以舉五藏六腑三焦四時之病若網在綱有條而不紊使人古外以知內視死而別生爲至詳悉咸可按用其文約其事詳者獨何哉蓋其爲書一本黃帝內經間有疎略未盡處而又補以扁鵲仲景元化之法自餘奇怪異端不經之說一切不取不知是何以歷千數百年而傳用

無毫髮之失乎又其大較以爲脈理精微其體難辨兼有數候俱見異病同脈之惑專之指下不可以盡隱伏而乃廣述形證虛實詳明聲色王相以此參伍決死生之分故得十全無一失之繆爲果不疑然而自晉室東渡南北限隔天下多事於養生之書實未遑暇雖好事之家僅有傳者而承疑習非將喪道真非夫聖人曷爲釐正恭惟主上體大舜好生之德玩神禹敘極之文推錫福之良心鑒慎疾之深意出是古書俾從新定臣等各殫所學博求衆本據經爲斷去取非私大抵世之傳授不一其別有三有以隋巢元方時行病源爲第十卷者考其時而繆自破有以第五分上下卷而撮諸篇之